

四庫全書

史部

欽定四庫全書

竹書統箋卷二

翰林院檢討徐文靖撰

帝堯陶唐氏

箋按夏書曰惟彼陶唐有此冀方左傳范宣子曰祖自虞以上為陶唐氏孔氏書傳

曰陶唐帝堯氏都許慎說文解字云陶丘再成也在濟陰顏師古曰陶丘有堯城堯嘗居之後居于唐故

號陶唐氏据竹書帝堯八十九年作游宮于陶九年帝游居于陶則臣瓚謂先居唐後居陶故號陶唐

氏也世紀曰帝堯始封于唐中山唐縣是也唐水在西北入唐河後又徙晉陽詩唐風譜曰唐帝堯舊都

之地今曰太原晉陽堯始居此後遷河東平陽括地志今晉州所治平陽故城是也又按陸氏釋文曰堯

唐帝名史記索隱曰堯謚也放勳名姓伊祁氏一統志保定府完縣西三十里有伊祁山本堯母所居据舜典帝曰格汝舜禹謨帝曰格汝禹堯舜禹宜皆是名雖周書謚法有翼善傳聖曰堯仁義盛明曰舜淵源流通曰禹蓋因上世之名號陳之為謚為後世所取法耳豈君之命臣不呼其名而有豫呼其謚之理

母曰慶都生于斗維之野常有黃雲覆其上

箋按春秋合誠

圖曰堯母慶都生而神異常有黃雲覆上及長觀于三河常有龍墮之一

且龍負圖而至其文要曰亦受天祐

箋按亦疑作赤許慎說文曰慶

都出觀于河有赤龍負圖而至曰赤龍受天之圖眉八彩鬚髮長七尺二寸

箋按春秋元命包曰堯眉八彩是謂通明歷象日月璇璣玉衡面銳上豐下足履翼

宿

箋按春秋感精符曰堯翼之精星在南方

既而陰風四合赤龍感之孕

十四月而生堯于丹陵

箋按四書攷曰高辛丁亥歲生堯于丹陵異紀曰堯母慶

都厚十四月而生堯其狀如圖及長身長十尺有聖德封于唐

箋按漢中山國唐縣也

夢攀天而上

箋按後漢書和熹鄧后紀后嘗夢捫天占夢者言堯

夢攀天而上即此也

元年丙子帝即位

箋按晦菴朱子曰溫公初作編年起于威烈王後又添至共和後又作稽

古錄始自上古然共和已上之年已不能推矣獨康節却推至堯元年皇極經世書中可見今攷皇極經世書堯元年甲辰又歷甲辰至乙卯在位七十二年以竹書紀年校之堯元年丙子則九年甲申十九年

甲午二十九年甲辰堯元年不得為甲辰也

居冀

箋按夏書曰維彼陶唐有此冀方孔傳曰陶唐帝堯氏都禹貢冀州既載孔傳曰堯所都也堯即帝

位都平陽乃冀州地也故竹書曰居冀

命羲和歷象

箋按堯典曰乃命羲和欽若昊天歷象日月星辰敬授人時分命羲仲宅嵎夷曰暘

谷寅宿出日平秩東作日永星鳥以殷仲春申命羲和宅南交平秩南訛敬致日中星火以正仲夏分命和仲宅西曰昧谷寅饒納日平秩西成宵中星虛以殷仲秋申命和叔宅朔方曰幽都平在朔易日短星昴以正仲冬孔傳曰星四方中星辰日月所會歷象其分節賈公彥周禮疏曰楚語堯復育重黎之後重黎之後即羲和也春秋文耀鉞曰唐堯即位羲和立渾儀唐大衍日度議曰古歷日有常度天周為歲終

故係星度于節氣其說似是而非故久而益差虞喜  
覺之使天為天歲為歲乃立差法追其變使五十年  
退一度何承天以為太過乃倍其年而反不及皇極  
取二家中數為七十五年蓋近之矣考古史及日官  
候簿以通法之三十九分半為一歲之差自帝堯演  
紀之端在虛一度及今開元甲子却三十六度而乾  
策復初矣日在虛一則鳥火虛昴皆以仲月昏中合  
于堯典劉炫依大明歷四十五年差一度則冬至在  
虛危而夏至火已過中矣梁武帝據虞劄歷百八十  
六年差一度則唐虞之際日在斗牛間而冬至昴尚  
未中以為皆承閏後節前月却使然而此經終始一  
歲之事不容頓有四閏故淳風因為之說曰若冬至  
昴中則夏至秋分星火星虛皆在未正之西若以夏  
至火中秋分虛中則冬至昴在已正之東互有盈縮不  
足以為歲差證是又不然今以四象分天北正元枵  
中虛九度東正大火中房二度南正鶉火中七星七

度西正大梁中昴七度總晝夜刻以約周天命距中星則春分南正中天秋分北正中天冬至之昏西正午東十八度夏至之昏東正在午西十八度晷漏使然也冬至日在虛一度則春分昏張一度中秋分虛九度中冬至胃二度中昴距星直午正之東十二度夏至尾十一度中心後星直午正之西十二度四序進退不踰午正間而淳風以為不叶非也

### 五年初巡狩四岳

按堯典帝曰咨四岳傳曰四岳即上羲和之四子分掌四岳之諸侯舜

典五載一巡狩羣后四朝傳曰各會朝于方岳之下凡四處故曰四朝堯舜同道舜攝則然堯又可知王制天子五年一巡狩鄭氏曰五年者虞夏之制也周則十二歲一巡狩白虎通曰巡者循也狩者牧也王者為天循行以牧人也五年再閏天道大備故五年一巡狩今括竹書五年一巡狩自堯昉也王詒之始

典記曰含涇縣有堯山堯巡狩至于此立行臺也是堯巡狩之事也

七年有麟

笺按春秋斗運樞曰衛星得則麒麟生萬人壽公羊傳曰麟者仁獸也有王者則至何休

曰狀如麕一角而戴肉設武備而不為害所以為仁也上有聖帝明王天下太平乃至孔叢子曰鉏商獲麟孔子觀之乃歌曰唐虞之世麟鳳遊今非其時來何求麟兮麟兮使我心憂益謂此也

十二年初治兵

笺按爾雅曰出為治兵尚威武也周禮大司馬職中秋教治兵隱五年傳三年

而治兵春秋提要曰治兵習戰也申明軍法以整齊之也莊子曰昔者堯攻叢枝胥敖國為虛厲身為刑戮又曰昔者堯問于舜曰我欲伐宗膾胥敖南面而不釋然其故何也又六韜曰堯與有苗戰于丹水之陽此堯之治兵蓋有以用之也



# 十六年渠搜氏來賓

筓按禹貢織皮昆侖析支渠搜武  
帝紀北發渠搜晉灼曰地理志朔

方有渠搜縣臣瓚曰禹貢渠搜在雍州西此渠搜在  
朔方又按揚雄曰大漢左東海右渠搜前番禺後陶  
塗東南一尉西北一候注會稽東部都尉燉煌玉門  
闕候則渠搜在西為右不在北涼土異物志古渠搜  
國在大宛北界隋書西域傳撥汗國都葱嶺之西五  
百餘里古渠搜國也東去疏勒千里去瓜州五千五  
百里大業中遣使朝貢則禹貢時之渠搜不在  
朔方陸氏禹貢釋文亦引漢志在朔方非也

# 十九年命共工治河

筓按堯典帝曰疇咨若予采驩兜  
曰共工方鳩僝功鄭氏曰共工水

官名馬融曰僝具也据竹書共工治河錫命在堯十  
九年改命伯鯨治河在堯六十一年則此四十餘年  
中皆共工治河而靜言庸違象恭滔天莊子釋文曰  
堯六十四年流共工于幽都則共工之流抑已晚矣

乃既流之後依然怙惡不悛左氏傳謂其靖言庸回服讒菟惡天下之民謂之窮竒山海經有禹攻共工國山周左史戎夫記曰昔有共工自賢自以無臣久空大官下官交亂民無所附唐氏伐之共工以亡荀子曰禹伐共工是也今順天府家雲縣東北五十里有共城蓋舜流共工處也

二十九年春焦僥氏來朝貢沒羽

箋按魯語仲尼曰焦僥氏三尺短之至也

山海經曰有小人名曰焦僥之國幾姓馬融廣成頌納焦僥之珍羽庾信哀江南賦西賚浮玉南琛沒羽也謂此也

四十二年景星見于翼

箋按孫氏瑞應書曰景星者天曜也狀如半月生于晦朔助月

為明王者不私人則見星傳曰翼二十二星二十度秋在太微垣南史記律書曰翼者言萬物皆有羽翼

也春秋感精符曰堯翼之精故是時景星見于翼也

五十年帝遊于首山乘素車玄駒

笺按沈約宋書曰堯升首山遵河渚有五

老遊焉宣二年傳曰初宣子田于首山杜注首山在河東蒲坂縣東南即是山也後世因名為堯山地理志蒲坂有堯山也五帝紀帝放勳富而不驕貴而不舒彤車乘白馬此云乘素車元駒亦是類也

五十三年帝祭于洛

笺按通鑑注曰洛水源自西寧洛南縣冢嶺山東流經盧氏永寧

宜陽洛陽偃師鞏等縣入河尚書中候曰帝堯修壇河洛昧爽禮備榮光出河休氣四塞又東沉璧于洛日稷赤光起元龜負書背甲赤文成字遂禪于舜

五十八年帝使后稷放帝子朱于丹水

笺按帝王世紀曰堯娶散宜氏

女曰女皇生丹朱荆州記曰丹水縣在丹州堯子朱之所封也漢志曰陶唐氏讓天下于虞使子朱處于丹淵為諸侯尚書益稷篇禹曰無若丹朱傲惟慢遊是好傲虐是作罔晝夜頡頏罔水行舟朋淫于家用殄厥世此丹朱之所以見放也括地志丹朱故城在鄧州內鄉縣西南百三十里賈公彥周官序曰初堯天官為稷据此則稷為天官故放帝子朱命之

### 六十一年命崇伯鯀治河

箋按史記索隱曰鯀帝顓頊之子字熙堯典曰帝曰咨四

岳湯湯洪水方割蕩蕩懷山襄陵浩浩滔滔天下民其咨有能俾乂僉曰於鯀哉帝曰吁咈哉方命圮族岳曰异哉試可乃已帝曰往欽哉孔傳曰堯知其性很戾圮族未明其所能而據衆言可試故遂用之何孟春曰堯之用鯀九載之民命亦可試乎宋初試策以發問而不能答予曰後漢鄭興傳有言堯知鯀不可

用而用之者是屈己之明因人之心也又張華博物志曰昔鯀注洪水而牧占大明曰不吉有初無後蓋謂此也今按竹書紀年顓頊三十載產鯀似鯀為顓頊子矣然產鯀之後四十八年而顓頊陟又歷高辛氏六十三年摯九年堯即位六十年始命崇伯鯀治河計前後相距一百八十一年而堯始命之治河無是理矣漢書律歷志顓頊五代而生鯀是為得之又世紀鯀封崇伯國在秦晉之間王伯厚曰趙穿侵崇是也寰宇記垓城臨泗水秦地志云垓城古崇國未知孰是

### 六十九年黜崇伯鯀

笺按周語太子晉曰其在有虞有密伯鯀播其滔心稱遂共工之過

堯用殛之于羽山連山易曰有崇伯鯀伏于羽山之野又按一統志羽山在淮安府贛榆縣西北八十里即舜殛鯀處山下有羽潭左傳鯀為黃能入于羽淵即此孔安國舜典傳曰羽山東裔在海中今登州府

蓬萊縣有羽山寰宇記云在縣東十五里即殛蘇處有蘇城在縣南六十里

七十年春正月帝使四岳錫虞舜命

箋按堯典曰帝曰咨四岳朕在位七

十載汝能庸命朕位岳曰否德忝帝位曰明明揚側陋師錫帝曰有鰥在下曰虞舜帝曰俞予聞五帝

本紀曰堯立七十年得舜是矣

帝在位七十年景星出翼鳳凰在庭

箋按風俗通曰景星者太星也

月或不見景星常見可以夜作有益于人民也尚書中侯握河紀堯即位七十年鳳凰止庭伯禹拜曰昔帝軒提象鳳凰巢阿閣又荀子解蔽篇詩曰鳳凰秋秋其翼若干其鳴若簫有鳳有鳳樂帝之心注曰逸詩也帝蓋朱草生  
箋按續博物志朱草狀如桑莖長三四尺枝葉皆丹汁如血朔望生

落如冀英周而復始嘉禾秀嘉禾按春秋感精符曰德淪于地則嘉禾生廣志曰堯時嘉禾生七莖

連三十五穗甘露潤醴泉出按列星圖曰天乳一星在氏北主甘露占明潤則甘露

降尚書中候曰帝堯即政七十載甘露潤澤醴泉出山日月如合璧五星如聯

珠按尚書中候曰天地開闢甲子冬至日月若懸璧五星若編珠易川靈圖曰至德之萌日月若連

璧五星厨中自生肉其薄如箠搖動則風生食物寒

而不臭名曰箠脯按脯一作蒲白虎通曰孝道至則箠蒲出庖厨不搖自扇于飲食

清涼助供養也宋書符瑞志脯一名倚扇帝王世紀作箠脯又有草夾階而生月

朔始生一莖月半而生十五莖十六日以後日落一

英及晦而盡月小則一英焦而不落名曰莫英一曰

歷英

箋按田棟子曰堯為天子莫英生于庭為帝成歷

洪水既平歸功于舜

將以天下禪之乃潔齊修壇塲于河洛擇良日率舜等升首山遵河渚有五老遊焉蓋五星之精也相謂

曰河圖將來告帝期知我者重瞳黃姚

箋按史記正義曰舜生于

姚虛故姓姚目重瞳子故曰重華

五老因飛為流星上入昴

箋按論語此考

識仲尼曰吾聞帝堯率舜等升首山觀河渚乃有五老游渚五老曰河圖將浮云云視五老飛為流星上入昴注曰入昴宿則復為星 二月辛丑昧明禮備至于日昃榮光



出河休氣四塞

箋按尚書中候曰帝堯即政七十載修壇河洛仲月辛日昧明禮備榮光

出河休氣四塞注曰榮光五色休美也按在帝堯七十載即是年事也

白雲起回風搖

箋按尚書中候曰堯沉璧于河白雲起迴風搖落

乃有龍馬銜甲赤文綠色

緣壇而上

箋按宋志作臨壇而上

吐甲圖而去甲似龜背廣九

尺其圖以白玉為檢

箋按書卷之表發謂之曰檢漢武紀金泥玉檢注檢一曰燕尾

今世書帖發也

赤土為口泥以黃金約以青繩

箋按河圖曰舜以太尉即

位與三公臨觀于河黃龍五采負圖出置舜前

文曰黃玉柙白玉檢黃金繩黃芝泥文曰黃帝符璽

闡色授帝舜言虞夏當受天命

箋按宋志曰闡色授帝舜言虞夏殷周秦

漢當受天命比此本多殿周秦漢四帝乃寫其言藏字知此為沈約附注非竹書本文也

于東序後二年二月仲辛率羣臣沉璧于洛禮畢退

俟至于下昃赤光起元龜負書而出背甲赤文成字

止于壇

箋按尚書中候曰堯沉璧于洛元龜負書出背甲赤文朱字上壇場沉璧于河黑龜出赤

文

其書言當禪舜遂讓舜

箋按帝王世紀曰堯率羣臣刻璧為書東沉洛水言

天命當禪舜之意今中候運衡之篇是也

七十一年帝命二女嬪于虞

箋按堯典釐降二女于媯汭媯于虞孔疏曰媯水在

河東虞鄉縣歷山西西流至蒲坂南入河舜居其旁周武王賜陳胡公之姓為媯為舜居媯水故也舜任

堯朝不家于京師而今二女歸虞者蓋舜以大孝示法使妻歸事于其親以帝之賢女事頑嚚舅姑美其能行婦道故云嬪于虞又按列女傳二女長曰娥皇次曰女英世本作女瑩大戴禮作女暉

七十三年春正月舜受終于文祖

笺按舜典曰正月上日受終于文祖孔傳

曰上日朔日也終謂堯終帝位之事文祖者堯文德之祖廟史記索隱曰尚書帝命驗曰五府五帝之廟蒼曰靈府赤曰文祖黃曰神斗白曰顯紀黑曰玄矩唐虞謂之五府夏謂之世室殷謂之重屋周謂之明堂皆祀五帝之所也

七十四年虞舜初巡狩四岳

笺按尚書大傳曰維元祀巡狩四岳八伯樂正定樂

名元祀代泰山貢兩伯之樂馬東岳陽伯之樂舞佺侏離其歌聲比余謠名曰皆陽義伯之樂舞佺哉其歌

聲比大謠名曰南陽中祀大交霍山貢兩伯之樂焉  
夏伯之樂舞謾或其歌聲比中謠名曰初慮羲伯之  
樂舞將陽其歌聲比大謠名曰未于秋祀柳穀華山  
貢兩伯之樂焉秋伯之樂舞蔡俶其歌聲比小謠名  
曰零落和伯之樂舞玄鶴其歌聲比中謠名曰歸來  
冬祀幽都弘山貢兩伯之樂焉冬伯之樂舞齊落歌  
曰纓纓并論八音四會歸格于禰祖用特按元祀春  
之首祀非元年之謂文中子曰舜一歲而巡五岳國  
不費而民不勞何也  
兵衛少而徵求寡也

### 七十五年司空禹治河

箋按舜典曰兪曰伯禹作司空  
孔傳曰禹代鯀為崇伯入為天

子司空鄭注曰初堯冬官為共工舜舉禹治水堯知其有聖德必成功故改命司空以官名寵異之非常官也禹貢導河積石至于龍門東至于華陰東至于底柱又東至于孟津東過洛汭至于大伾北過降水

至于大陸又北播為九河同為逆河入于海宋易祿  
禹貢疆理攷曰河自廓州積石軍北東北流一百五  
十里至化成縣南八十步東流一百四十里至鄯州  
龍支縣西南六十里積石山在縣西九十八里又三  
百九十里至河州枹罕縣南五十里積石在縣西北  
七十里一名唐述山今人目龍支縣山為大積石此  
山名小積石又三百里至蘭州五泉縣北二十里東  
北流三百八十里至會州之會寧縣西北有黃河堰  
又五百三十里至靈州之迴樂縣枕黃河後魏刁雍  
開富平艾山舊渠通河溉田之地又經靈武縣又一  
千餘里至西受降城東流一百八十里至天德軍又  
二百里至中受降城又三百里至東受降城三城皆  
唐張仁愿所築並在河岸以遏突厥河轉南流三百  
五十里至朔方之鄯陽縣西三十里又三百七十四  
里至嵐州之合河縣西二里又七十里至石州之臨  
泉縣北二十里又經定胡縣西二百步孟門關在縣

西一百步又經平夷縣五十里又四百二十里至隰州之永和縣六十里又經大寧縣又二百里至慈州之吉昌縣北六十里又經文城縣孟門山在縣西南三十六里河中有山如槽水流懸注七十餘尺俗名石槽與龍門相對即龍門之上口為河之巨阨又一百八十里至河中府之龍門縣北二十五里乃龍門口河自積石至龍門計四千七百二十三里又二百里至陝州之西北對河為華州華陰縣河經太華之北故曰華陰河至此東流經陝州之芮城縣又五十里至陝石縣有底柱山在河中又三百五十里至河南府王屋縣南五十里又至河陽縣後為孟州南城四面臨河謂之富平津古謂之孟津東百里至今鞏縣有五社渡洛水入河謂之洛口亦名什谷張儀所謂下兵三川塞什谷之口者也又經汜水縣本漢成臯縣一名虎牢三百九十里至衛州汲縣南五十里謂之棘津亦謂之石濟津東北流至黎陽縣大伾山

在縣南七里俗號為黎山二百五十里至相州臨河縣南五里又八十里至濱州頓邱縣南二十五里北流一百二十里至魏州之貴鄉縣大河故清在縣西三里俗云王莽河東北流二百一十里至貝州經城縣枯河在縣東十里又二百一十里至冀州南宮縣泲水故清在縣東南六里又北二三百里至趙州之隆平舊為大陸縣孔傳曰大陸澤名北分為九河以殺其溢同合為一大河名逆河而入海也董鼎曰天下大勢西北高而東南下九水惟河為大水患惟河為急河始入于雍而經于冀則冀當河之下流而兗又其下流之入海處所以禹之功後自冀而兗則疏濟之下流也自青而徐則疏淮之下流也自揚而荆則疏江漢之下流也河濟淮江漢五水之下流既通水患平已十之七八矣然上流不濬則猶有壅塞於是自荆而豫以濬伊洛之源自豫而梁以濬江漢之源自梁而雍以濬河渭之源從北而東從東而南從

南而西從西而又  
北治水之功隸矣

七十六年司空伐曹魏之戎克之

笺按古今人表陸終妃女潰生六子五曰

曹姓韋昭曰曹祝融之後左傳詹桓伯曰魏吾西上也盟會圖曰魏嬴姓呂氏春秋曰堯戰于丹水之浦

以服南蠻舜却苗民更易其俗禹攻曹魏屈驚以行其教高誘曰屈驚不知出何書也

八十六年司空入覲費用玄圭

笺按尚書璇璣鈴曰玄圭出刻曰延喜之玉注

曰禹功既成天佩以玄圭也是時玄圭出而禹得之因以為贄禹貢曰禹錫玄圭告厥成功爾雅曰錫與也則禹錫猶堯典師錫之錫謂入覲而以圭與帝為贄也孔傳曰禹功盡加于四海故堯賜玄圭以彰顯之則是當言錫禹矣何言禹錫竹書稱費用玄圭其義自明白虎通曰臣見君所以有贄何贄者質也質



己之誠致已  
之恫幅也

八十七年初建十有二州

箋按周公職錄曰黃帝受命風后受圖割地布九州祭法

共工氏之霸九州也其子曰后土能平九州則自古止有九州無十二州尚書大傳云兆十有二州注兆

域也為營域以祭十有二州之分星也舜典肇十有二州孔傳曰禹治水之後舜分冀州為幽州并州分青

州為營州始置十有二州陸氏釋文曰十有二州謂冀兗青徐荆揚豫梁雍并幽營也時舜以冀青地廣

始分衡水西北為并州燕以北為幽州青州東北跨海為營州故竹書謂初建十有二州也世史類編曰

堯甲子八十一載分十二州封十二山濬川舜攝政九載也据竹書在堯八十七載舜受終之五載也

八十九年作游宮于陶

箋按史記曰堯作游成陽漢志曰濟陰定陶詩風曹國也昔堯

作游成陽舜漁雷澤故其民猶有先王之遺風如淳  
曰作起也成陽在定陶師古曰作游者言為宮室游  
止之處也

九十年帝游居于陶

箋按郡國志濟陰定陶縣古陶堯所居又臣瓚注漢書曰堯初居唐

後居陶故曰陶唐顏師古非之以為堯嘗居陶後居唐今據竹書堯九十載始居陶瓚說是也

九十七年司空巡十有二州

箋按堯即位五年初巡四岳七十四年虞舜初巡

狩四岳是以舜代堯巡也堯八十七年初建十有二州後十年司空巡十二州是以禹代舜巡也舜典肇十有二州以舜攝位時事也故係之舜漢書谷永傳堯遭洪水之災天下分絕為十二州制遠之道微以其本堯時事也故係之堯其說與竹書同

一百年帝陟于陶

箋按堯元丙子終乙卯凡一百年異苑晉太康三年冬大寒南州人見二

鶴語曰今歲不減堯崩年呂氏春秋曰堯葬穀林帝王世紀曰堯在位九十八年一百一十八歲乃殂

葬于濟陰之成陽西北四十里是為穀林堯娶散宜氏女曰女皇生丹朱又有庶子九人皆不肖故

以天下命舜今据竹書堯在位百年世紀少二年也

帝子丹朱避舜于房陵舜讓不克

箋按地理志房陵縣屬漢中郡顏師

古曰今謂之房州此丹朱所避也附注云房陵是据世本舜封丹朱于房一統志房縣在鄖陽府城西南

三百一十里舜封堯子丹朱于房即此朱遂封于房為虞賓三年舜即

天子之位

箋按春秋為房子國後漢獻帝紀贊曰永作虞賓注虞賓謂舜以堯子丹朱為賓尚

書曰虞賓  
在位是也

帝舜有虞氏

箋按帝王世紀曰舜嬪于虞因以為虞氏今河東太陽西山上虞城是

母曰握登見大虹意感而生舜于姚虛

箋按帝王世紀曰舜姚姓

也其先出自顓頊顓頊生窮蟬窮蟬子敬康敬康生勾芒勾芒子橋牛橋牛生替睪替睪妻曰握登見大虹意感而生舜于姚虛故姓姚氏字都君

括地志姚虛在濮州雷澤縣東十三里

目重瞳子

故名重華

箋按春秋孔演圖曰舜重瞳子是謂重明上應攝提以象三光又後漢邳惲傳曰步

重華于南野太子龍顏大口黑色箋按孝經援神契賢注重華舜字也曰舜龍顏重瞳大

口手握髮身長六尺一寸舜父母憎舜使其塗廩自下焚

之舜服鳥工衣服飛去

箋按通史曰替使舜祿廩舜告堯二女女曰時其楚汝

鵲汝衣裳鳥工往舜既登廩得免去也

又使浚井自上填之以石舜服

龍工衣自旁而出

箋按通史曰舜穿井又告二女女曰去汝裳衣龍工往入井替使與

象下上實井舜從他井出去也郭璞山海經注曰二女靈達尚能以鳥工龍裳救井廩之難又南史江敷辭婚表曰何瑀闕龍工之姿而捐軀于深井蓋謂此也耕于歷箋按史記舜耕于歷山漁于雷

澤陶于河濱作什器于壽丘就時于負夏郡國志河東蒲坂有雷首山亦名歷山舜所耕處括地志歷山

南有舜井

夢眉長與髮等遂登庸

箋按世紀曰堯見舜于貳宮南面而問政乃試以五典舜

有大功二十故夢眉與髮等堯乃賜  
舜以昭華之玉老而命舜代己攝政

元年己未帝即位

按舜元年即位世史以為甲申袁史以為丙辰紀政綱目以為丙戌惟

竹書以為己未蓋帝堯崩于乙卯舜避朱南河雖三年喪畢不遽即位至四年己未乃即位者孟子所謂

然後之中國踐天子位馬又按帝王世紀曰舜攝政二十八年而堯崩三年喪畢舜年八十一以仲冬甲

子月次于畢始即真以土承火色尚黃以正月元日格于文祖年百歲也据孔安國注通服堯喪三年在

位共三十年之數凡壽一百一十一歲後漢書襄楷傳注舜年一百一十二歲則世紀言百歲者非也

居冀

按舜都蒲坂今平陽府蒲州也亦禹貢冀州之地故曰居冀

作大韶之樂

按尚書大傳虞夏傳曰維五紀奏鍾石論人聲及乃鳥獸咸變于前秩養耆老而

春食孤子乃勃然詔樂興于大麓之野執事還歸二  
年譏然作大唐之歌此蓋原大詔所由作也五紀者  
十二年為一紀舜三十徵  
庸三十在位是五紀也

即帝位冀莢生于階鳳凰巢于庭擊石拊石以歌九

韶百獸率舞景星出于房

箋按石氏曰房四星為天子明堂歲始布政之堂也

地出乘黃之馬

箋按管子小匡篇昔人之受命者河出圖洛出書地出乘黃房玄齡注曰

乘黃神馬也又周書王會解云白民乘黃乘黃似騏背有兩角

三年命皋陶作刑

箋按舜典曰帝曰皋陶汝作士五刑有服五服三就五流有宅五宅三居

惟朋克允王肅曰惟明其罪能使之信服是施信于彼也

九年西王母來朝

箋按地理志金城臨羌縣西北至塞外有西王母石室僊海鹽池西有須

抵池有弱水昆侖山祠大戴記曰舜以天德嗣堯西王母獻其白瑄世本曰舜時西王母獻白環及珮雒

書靈准聽曰舜受終西王母獻益地圖歐陽詢曰西王母得益地之圖來獻

西王母來朝獻白環玉玦

箋按瑞應圖曰黃帝時西王母獻白環舜時又獻之

晉志曰舜時西王母獻朝華之瑄以玉為之及漢章帝時零陵文學奚景于冷道舜祠下得白玉瑄一枚咸以為舜時西王母所獻云意是時王母以玉瑄獻舜舜或賜象鼻亭去冷道不遠故于舜祠下得此

十四年卿雲見

箋按晉天文志曰慶雲亦曰景雲即卿雲也帝舜卿雲之歌曰卿雲爛兮糺糺

糺兮糺聚也言慶雲叢聚也後世不知多有謠糺為禮者宋陳騭文則引卿雲之歌作禮糺糺沈約家書



符瑞志亦作禮字皆誤以紉為礼也惟吳淑雲賦或申歌于虞舜注引尚書大傳曰紉縵縵今止此作紉可証書傳之誤

命禹代虞事

筭按帝王世紀曰禹在位七十四年舜始薦之于天

舜在位十有四年奏鐘石笙箎未罷而天大靄雨疾

風登屋拔木

筭按登誤宋志作發

桴鼓播地鐘磬亂行舞人頓

伏樂正狂走舜乃擁堵持衡而笑

筭按堵一本作磬宋志作墟擁墟持

衡据周禮凡懸鐘磬之全為堵半為肆謂鐘磬各八共十六枚而在一簾則此作堵者是也

曰明

哉天下非一人之天下也亦乃見于鐘石笙箎乎乃

薦禹于天使行天子事于時和氣普應慶雲興焉若

烟非烟若雲非雲郁郁紛紛蕭索輪囷百工相和而

歌卿雲帝乃倡之曰卿雲爛兮禮縵縵兮

箋按尚書大傳冬伯

之樂舞齊落歌曰縵縵不知即此否禮亦紕譌

日月光華旦復旦兮羣臣咸

進稽首曰明明上天爛然星陳日月光華弘予一人

帝乃再歌曰日月有常星辰有行四時從經萬姓允

誠於予論樂配天之靈遷于聖賢莫不咸聽養乎鼓

之軒乎舞之

箋按大傳義伯之樂舞裝哉

精華以竭褻裳去之於

是八風循通

箋按循宋志作脩

慶雲叢聚蟠龍奮迅于其藏

鮫魚踊躍于其淵龜鼈咸出其穴遷虞而事夏舜乃

設壇于河依堯故事至于下昃榮光休氣至黃龍負

圖長三十二尺廣九尺出于壇畔赤文綠錯其文言

當禪禹

箋按春秋運斗樞曰舜為天子東巡臨觀黃龍五采負圖出置舜前

十五年帝命夏后有事于太室

箋按水經注曰河南陽翟縣有夏亭城夏禹始

封于此為夏國是禹以司空受封于夏故至是改稱

為夏后也山海經曰半石山東五十里曰少室山又東三十里曰太室山郭注曰即中嶽嵩高山也孔氏書疏曰有事祭也禮器曰齊人將有事于泰山是亦

以有事  
為祭也

十七年春二月入學初用萬

箋按夏小正曰二月丁亥萬舞入學丁亥者吉日也

萬舞者干戚舞也入學也者大學也詩簡兮簡兮方將萬舞毛傳曰以干羽為萬舞是萬舞兼用干羽乃夏制也仲尼燕居曰夏箏序興陳氏曰夏箏禹大夏之箏曲以箏吹之也据此則是所吹者箏而所舞者干羽也虞書舞干羽于兩階亦兼干羽而言也左傳隱五年考仲子之宮將萬焉公問羽數于衆仲對曰天子用八諸侯用六是萬舞不專用干兼用羽也孔氏詩疏曰萬舞名也萬舞為干舞不兼羽箏以春秋云萬入去箏別文公羊傳曰箏者何箏舞萬者何干舞言干則有戚矣禮記曰朱干玉戚冕而舞大武言箏則有羽矣箏師曰教國子舞羽吹箏是干羽之異也然箏可吹不可舞既云丈舞即當舞羽何又舍羽

而舞箛是則公羊之誤也樂師舞羽吹箛蓋教園子以舞羽不言舞干羽者省文也隱公因萬而專問羽豈萬舞不用干乎又萬入去箛乃是干羽既入則止箛不吹故云去箛若萬不用箛已無箛矣何待去乎

### 二十五年息慎氏來朝貢弓矢

箛按鄭康成曰息慎或謂之肅慎東北夷山海

經大荒之中有山名曰不咸有肅慎氏之國郭璞曰今肅慎國去襄平三千餘里其人皆工射弓長四尺勁彊箭以楛為之長尺五寸青石為鏑

### 二十九年帝命子義均封于商

箋按世紀曰娥皇無子女英生商均据竹書則

本名義均以封于商曰商均呂氏春秋去私篇舜有子九人高誘曰國語云舜有商均此曰九子不知出何書也又按山海經曰帝俊生季釐是與均為二也其他七人無聞焉

三十年葬后育于渭

附注曰后育娥皇也。○箋按地理志扶風陳倉縣有黃帝孫舜妻育

家祠蓋即舜后育冢也。漢志注誤育為盲，鄜元渭水注引此亦作舜妻盲冢千數百年無辨其非者。不有竹書何由知其為育哉？楚辭湘君湘夫人君不行兮夷由，帝子降兮北渚，朱子集注曰君謂湘君，堯之長女娥皇為舜正妃者也。帝子謂湘夫人，堯之次女，女英，舜次妃也。今據竹書云堯七十二年二女嬪，虞其後三十年堯崩，舜在位又五十年崩于蒼梧之野，計二女二十而嫁，已並百歲，何有百歲之妃？后從行，巡省溺死湘江，而世仍稱之為帝子乎？况檀弓有曰舜崩于蒼梧之野，蓋三妃未之從，其不得溺于湘江明矣。今竹書載帝舜三十年葬，后育于渭，班志載舜妻育冢，劉向傳舜葬蒼梧，二妃不從，皆與竹書合，則從行而溺于湘江者，又何人乎？王逸注以娥皇、女英墮湘水溺焉，其貽誤後學為不少矣。

三十二年帝命夏后總師遂陟方岳

格按大禹謨帝曰格汝禹朕宅帝位

三十有三載髦期倦于勤汝惟不怠總朕師孔傳曰稱總我衆欲使攝至于遠陟方岳者正以見禹之不

怠徧歷四方以朝諸侯也若謂付托得人舜遂可巡陟方岳又何謂倦于勤乎周書立政曰以陟禹之迹

方行天下至于海表罔有不服則陟方屬禹可知爾雅釋詁格陟躋登升也文選吳都賦注劉淵林曰陟

升也方道也則是方岳者四方之岳如東方岱西方華南方衡之類陟則升于四方之岳也

三十三年春正月夏后受命于神宗

月朔日受命于神

宗率百官若帝之初孔傳曰受舜終事之命神宗文祖之宗廟言神尊之尚書帝命驗帝者承天立五府

也禹受終于神宗即黃府也神宗蓋神斗與赤曰文祖黃曰神斗則舜受終于文祖即赤府也

遂復九州

箋按襄四年傳虞人之箴曰芒禹跡畫為九州禹貢冀州既載濟河惟兗州海岱惟青

州海岱及淮惟徐州淮海惟揚州荆及衡陽惟荊州荆河惟豫州華陽黑水惟梁州黑水西河惟雍州王伯厚地理通釋曰孔氏云禹治水之後舜分冀為幽并分青為營馬氏云禹平水土置九州舜以冀州之北廣大分置并州燕齊遼遠分燕為幽齊為營漢地理志云堯遭洪水天下分絕為十二州禹平水土更置九州列五服與孔馬之說異愚謂舜典言肇十有二州咨十有二牧而後命禹平水土當以漢志為正今据竹書堯七十五年司空禹治河八十六年司空入觀贊用玄圭八十七年初建十有二州九十七年司空巡十有二州舜三十三年夏后受命于神宗遂復九州則是禹平水土舜始分十有二州尚書封十有二山濬川但言濬則是水土之既平可知若禹未治水之前洪水滔天懷山襄陵何從而封山濬川



此當以孔氏之傳為正若馬氏禹平水土置九州舜始分十有二州則謬矣周公職錄黃帝割地布九州杜佑通典顓頊置九州世紀言九州顓頊所建帝嚳受之則堯嗣位時本是九州至舜分十二州故曰肇禹受命遂復九州以前原有九州故曰復又按世紀云禹平水土還為九州今禹貢是也其時九州之地凡二千四百三十萬八千二十四頃定墾者九百一十萬八千二十四頃不墾者一千五百萬二千頃四海之內東西二萬八千里南北二萬六千里出水者八千里受水者八千里名山五千三百五十徑六萬四千五十六里出銅之山四百六十七出鐵之山三千六百九以供財用

### 三十五年帝命夏后征有苗

箋按大禹謨帝曰咨禹惟是有苗弗率汝徂征禹乃

會羣后誓于師曰蠢茲有苗昏迷不恭侮慢自賢反道敗德肆予以爾衆士奉辭代罪三旬苗民逆命益

贊于禹曰至誠感神矧茲有苗禹拜昌言班師振旅  
帝乃誕敷文德舞干羽于兩階七旬有苗格孔傳曰  
三苗國名緡雲氏之後為諸侯號饕餮左傳文十八  
年史克曰緡雲氏有不才子貪于飲食冒于貨賄天  
下之民以比三凶謂之饕餮山海經苗民釐姓魏策  
吳起曰昔者三苗之居左有彭蠡之波右有洞庭之  
水汶山在其南而衡  
山在其北恃此險也

### 有苗氏來朝

箋按夏本紀三危既度三苗大序索隱曰鄭氏引河圖及地說云三危山在鳥鼠西

南與岐山相連後漢郡國志隴西首陽縣鳥鼠同穴山渭水出劉昭引地道記曰有三危山三苗所處水經注曰渭水東歷大利又東南流苗谷水注之三苗所居故有苗谷通鑑前編堯七十六載竄三苗于三危當猶是竄之隴西之地舜三十五載有苗氏來朝其在于羣后之例可知山海經苗民釐姓顓頊後昭

九年傳曰允姓之姦居于瓜州杜氏曰允姓之祖與三苗俱放于三危瓜州今燉煌也穆天子傳曰乙丑天子東征鯀魘送天子至于長沙之山伯夭曰重暵氏之先三苗氏之國處郭璞曰三苗舜所魘于三危者是則長沙之山即後漢書注三危山在沙州東南者也韓非子曰三苗有成駒亡國之臣也其遠魘于瓜沙者蓋此輩耳

四十二年玄都氏來朝貢寶玉

按汲冢周書曰昔玄都賢鬼道廢人事天謀

臣不用龜策是從神巫用國哲士在外玄都以亡又按春秋定八年穀梁傳注寶玉者封圭也范甯曰始封之圭也据書叙湯伐三脛俘厥寶玉則美玉皆謂之寶玉也

四十七年冬隕霜不殺草木

按春秋僖三十三年十月有二月隕霜不殺草五行

傳曰劉歆以  
為草妖也

### 四十九年帝居于鳴條

箋按郡國志河東安邑帝王世紀曰縣西有鳴條陌括地志高

涯原在安邑縣北其南坂口即古鳴條陌按舜都蒲坂距鳴條二百餘里舜居鳴條亦如堯居城陽也又困學記聞以舜卒鳴條在今陳留之平丘

### 五十年帝陟

箋按舜典曰舜五十載陟方乃死蔡傳曰陟方猶言升遐也韓昌黎曰竹書紀年帝

王之沒皆曰陟陟升也謂升天也書曰殷禮陟配天言以道終其德協天也故書紀舜之末曰陟其下言方乃死者所以釋陟為死也地之勢東南下如言舜巡狩而死宜言下方不得言陟方也按此得之但不當以陟為絕句耳方猶云徂乎方之方陟方而死猶云徂落而死也史記言舜巡守崩于蒼梧之野孟子

言舜卒于鳴條未知孰是今据竹書四十九年舜居于鳴條五十年帝陟則是與孟子合也書所言陟方蓋鳴條有陟方之館耳竹書舜三十三年命夏后總師遂陟方岳可謂遂徂落于四岳乎宋顏延之祭虞帝文百齡厥世萬里陟方後魏溫子昇舜廟碑陟方之駕遂往蒼梧之窆不歸則陟方非徂落之謂可知矣

義均封于商是謂商均

箋按史記曹相國世家攻下邑以西至虞正義曰虞城縣

在宋州北五十里古虞國商均所封一統志虞城縣在歸德府城東北六十里當時并高丘皆在國內故曰商 后育娥皇也 箋按地理志扶風陳倉縣有舜妻育冢竹書后育葬于渭是也 鳴

條有蒼梧之山帝崩遂葬焉今海州

箋按帝王世紀曰舜薦禹于天

使禹攝政有苗氏叛南征崩于鳴條殯以瓦棺葬于  
蒼梧九疑山之陽是為零陵方輿紀勝曰蒼梧山  
海經注即九疑也在今永州府道州寧遠縣南六十  
里湘中記曰九山相似行者疑惑故曰九疑据世紀  
則舜以征有苗道死何三十五年命夏后征有苗至  
十五年後舜年百有十歲轉又自征有苗何舜之不  
憚煩耶司馬溫公詩虞舜在倦勤薦禹為天子豈有  
復南巡遂迨渡湘水蓋以此也王應麟困學紀聞曰  
世傳舜葬蒼梧之野孟子以為卒于鳴條呂氏春秋  
葬葬于純蒼梧山在海州界近莒之紀城鳴條在陳  
留之平丘今攷九域志海州東海縣有蒼梧山與  
休文附注正同則舜不當遠葬于零陵庶為得之

竹書統箋卷二

欽定四庫全書

史部

竹書統箋卷三五

詳校官編修

臣范來宗

洗馬臣王坦修覆勘

總校官進士

臣繆琪

校對官主簿

臣汪日贊

謄錄監生

臣王寶唐



欽定四庫全書

竹書統箋卷三

翰林院檢討徐文靖撰

帝禹夏后氏

箋按紀年曰帝舜十四年命禹代虞事十五年帝命夏后有事于太室時禹受封為

夏伯稱為夏后禹有天下因以為氏也南軒通鑑前編曰禹踐天子之位于韓注引通志曰禹受帝舜之

禪踐天子之位于安邑即韓國也此大謬矣漢志潁川陽翟夏禹國周末韓景侯自新鄭徙此應劭曰夏

禹都也世紀曰禹受封為夏伯在禹貢豫州外方南於秦漢屬潁川本韓地今河南陽翟是也外紀曰禹

都安邑或云平陽亦云晉陽及韓韓亦謂陽翟耳南軒引通志謂安邑即韓國謬矣

母曰脩己出行見流星貫昴夢接意感

按帝王世紀曰蘇納有

華氏女曰志是為脩己元命包曰昴  
七星十一度帝位明即昴星光大

既而吞神珠脩

己背剖而生禹于石紐

按李石續博物志曰蕙茂一名舜珠禮緯曰禹母脩己

吞蕙茂而生禹因姓姁氏揚雄蜀本紀曰禹本汶山  
郡廣柔縣人也生于石紐適甲開山圖榮氏解曰女

狄暮汲石紐山下泉水中得月精如雞子愛而含之  
不覺吞遂有娠十四月生夏禹晉載記劉元海曰大

禹出于西戎文王生于西夷顧惟德所授耳  
括地志石紐山在茂州汶川縣西七十二里 虎鼻口

兩耳參鏤

按鏤當作漏禮別名記曰禹耳三

首戴

鈎鈐

按星傳曰鈎九星鈐一星其星明則道大昌

胸有玉斗

按帝王紀曰禹胸有玉

斗足文履已故名文命長有聖德長九尺九寸

箋按續博

物志曰禹長九尺九寸夢自洗于河取水飲之又有白狐九尾

之瑞

箋按趙擘吳越春秋曰禹年三十未娶行塗山恐時暮失嗣曰吾之娶必有應矣乃有白狐九

尾而造于禹於是塗山人歌曰綏綏白狐九尾麕麕成于家室我都攸昌禹因娶塗山女一統志漢當塗縣城在今懷遠縣塗山北麓下即古塗山氏之國當堯之時舜舉之禹觀于

河有長人白面魚身出曰吾河精也呼禹曰文命治

水言訖授禹河圖言治水之事乃退入于淵

箋按世紀曰禹

名文命字高密水經注曰禹理水觀于河見白面長人魚身出曰吾河精也授禹河圖而還于淵禹

治水既畢天錫玄圭以告成功

箋按宋書符瑞志水泉流通四海會同則

元珪出一統志岷山在岷州衛城北山黑無樹木  
泚水經其下相傳夏禹見長人受黑玉書於此

夏

道將興草木暢茂青龍止于郊祝融之神降于崇山

乃受舜禪即天子之位

箋按漢郊祀志曰夏得木德青龍止于郊草木暢茂括地

圖曰夏德盛二龍降之帝使范氏御之以行國語曰  
夏之興也祖融降于崇山注曰祖融祝融也崇嵩字

古通 用耳 洛出龜書是為洪範

箋按尚書洪範曰天乃錫禹洪範九疇孔傳曰天與

禹洛出書神龜負文而出列于背有數至于九禹遂  
因而第之以成九類一統志龜巢在河南府永寧縣

西洛水北岸玄澗水濱乃  
夏禹治水洛書呈瑞處

三年喪畢都于陽城

箋按世本

曰禹都陽城徐堅曰夏禹在陽城蓋避舜子商均非都也

元年壬子帝即位

箋按舜在位五十年元己未崩戊申而己酉庚戌辛亥三年喪畢故禹元

年為壬子

居冀

箋按郡縣志安邑故城在陝州夏縣東北十五里禹所都也世紀曰堯都平陽舜都蒲坂禹都安邑相去不盈二百里皆在冀州故竹書總曰居冀

頌夏時于邦國

箋按禮運曰孔子曰吾欲觀夏道是故之杞而不足徵也吾得夏時焉太史公

曰孔子正夏時學者多傳夏小正云夏小正序曰孔子得夏時于杞而鄭注月令文辭大抵嚴約不類秦漢以來信其為有夏氏之遺書其間星昏旦伏見中正當鄉若寒暑日風冰雪雨旱之節草木稊秀之候

羽毛鱗鱗蠕動之屬蟄興粥伏鄉遭陟降離隕鳴响之  
應罔不具紀而王政民事繫焉蓋夏之月令也唐志  
大衍歷議曰夏小正雖頗疎簡失傳乃羲和遺跡何  
承天循大戴之說復用夏時更以正月甲子夜半合  
朔雨水為上元進乖夏歷退非周正故近代推月令  
小正者多不與古合開元歷推夏時立春日在營室  
之末昏東井二度中古歷以參右肩為距方當南正  
故小正曰正月朔昏斗杓懸在下魁枕參首所以著  
參中也季春在昴十一度半去參距星十八度故曰  
三月參則伏立夏日在井四度昏角中南門右星入  
角距西五度其左星入角距東六度故曰四月初昏  
南門正昴則見五月節日在輿鬼一度半參去日道  
最遠以渾儀度之參體始見其肩股猶在濁中房星  
正中故曰五月參則見初昏大火中八月參中則曙  
夫傳也辰伏則參見非中也十月初昏南門見亦失  
傳也定星方中則南門伏非昏見也仁山金氏曰八

月參中則旦當作參見爾歧張氏曰金氏之說本大  
行議曰八月參中則曙失傳也辰伏則參見非中也  
故曰當作參見不知八月辰伏自以昏時伏參中自  
以平旦中何得以昏時之伏而例平旦之參謂其始  
乎見

### 三年臯陶薨

箋按臯陶字庭堅見左傳後漢書馮衍顯  
志賦臯陶釣于雷澤兮賴虞舜而後親太

子賢注曰呂氏春秋曰舜陶于河濱漁于雷澤今言  
臯陶未詳皇甫謐曰臯陶生于曲阜偃地故帝因之  
而以賜姓曰偃堯禪舜命之作士舜禪禹禹即舜位  
以臯陶最賢薦之于天將有禪之意未及禪會陶  
卒水經注曰六縣故臯陶國也禹封其少子奉其祀  
今縣都陂中有大冢民傳曰公琴者臯陶冢也楚人  
謂冢為琴矣按琴乃岑之譌  
耳鄰云楚人謂冢為琴非

五年巡狩會諸侯于塗山

箋按王制曰天子五年一巡狩五年者虞夏之制也夜七

年傳諸大夫對孟孫曰禹合諸侯于塗山執玉帛者萬國杜氏曰諸侯執玉附庸執帛塗山在壽春東北地理通釋曰在壽春東北濠州鍾離縣西九十五里山前有禹會村尚書禹娶于塗山辛壬癸甲天問禹身獻功降省下土焉得彼塗山女而通之于台桑即此塗山也一統志塗山在懷遠縣東南八里又皇侃注孝經曰春秋稱禹會諸侯于塗山執玉帛者萬國言禹要服之內地方七千里而置九州九州之中有方百里七十里五十里之國計有萬國也

南巡狩濟江中流

箋按呂氏春秋曰禹自塗山巡省南土

有二黃龍負

舟舟人皆懼

箋按吳越春秋曰禹南渡江黃龍負舟

禹笑曰吾受命于



天屈力以養人生性也死命也奚憂龍哉龍于是曳

尾而逝

箋按水經注江水又右楊岐北山山東有城故華容縣尉舊治也大江又東北合于夏口

又東左得候臺水口又右得龍穴水口江浦右迤也北對虎洲又洲北有龍巢地名也昔禹南濟江黃龍夾舟禹笑曰吾受命于天何憂龍哉故水地取名矣

八年春會諸侯于會稽

箋按吳越春秋曰禹巡天下登茅山以朝羣臣乃大會計治國

之道更名茅山曰會稽水經注曰會稽山古防山也亦謂之為茅山又曰棟山左傳禹會諸侯于塗山預注塗山在壽春東北非也余按國語仲尼曰昔禹致羣神于會稽之山防風氏後至殺之蓋立明親承聖旨錄為實證故塗山有會稽之名今據禹會塗山在五年會會稽在八年先後懸殊非一地矣鄭注承劉

向說苑之謠  
不知其非

殺防風氏

按國語仲尼曰防風汪罔氏守封禺之山者也今湖州府武康縣是也世說會稽有防

風鬼屢見城邑常跣雷門上脚乘至地晉橫陽令賀福義鼓琴防風聞琴聲在賀中庭舞

夏六月雨金于夏邑

按帝王世紀曰夏禹時天雨金蒼頡時雨粟天鏡曰天雨金為兵

喪徐堅曰唐虞以前都名不著自夏以後各有所稱白虎通曰夏為夏邑商為高邑周為京師

秋八月帝陟于會稽

按吳越春秋禹老而嘆曰吾年壽將盡止死斯乎乃命羣臣葬我

于會稽之山越絕書禹葬會稽鳥為之芸地理志會稽山陰縣會稽山在南上有禹冢禹井墨子曰禹葬會稽之山既葬收餘壤其上隴若參耕之畝則止矣

禹立四十五年

箋按竹書帝舜十四年壬申命禹代虞事至舜五十載戊申凡三十七年

舜陟而已酉庚戌辛亥三年喪畢禹即位元年壬子八年己未凡四十五年帝王世紀曰禹年七十四舜始薦之于天薦後十二年始使禹攝行天子事五年舜崩禹除喪明年始即真年百歲崩於會稽禹

薦益于天七年禹崩三年喪畢天下歸啓

箋按古今人表禹娶

塗山氏女曰女趨生啓漢書武帝紀行幸緱氏詔曰朕用事華山至于中嶽見夏后啓母石應劭曰啓生而母化為石文穎曰在嵩高山下陳氏仁錫曰啓一名會見紀年連山易作余又曰建見年代歷山海經作夏后開避漢諱也

帝啓

箋按夏本紀禹子啓賢天下屬意焉禹崩雖薦益益之佐禹日淺天下未洽故諸侯皆去益而朝啓

元年癸亥帝即位于夏邑

笺按郡國志潁川陽翟禹所都蓋禹始封于此為夏伯啓

即位居此故曰夏邑帝王世紀曰禹都平陽或在安邑或在晉陽何以知此夏邑非安邑平陽諸地也以

啓饗諸侯于陽翟之鈞臺故知啓即位于夏邑即陽翟是也

大饗諸侯于鈞臺諸侯從

笺按昭四年傳椒舉言于楚子曰夏啓有鈞臺之饗杜注

河南陽翟有鈞臺陵水經注曰嶠水東逕三封山東南歷大陵西連山易曰啓筮亭啓享神于大陵之上即鈞臺也一統志鈞臺在禹州城北門外又周禮掌賓曰上公三饗是天子於諸侯稱饗也

帝歸于冀都

笺按括地志安邑故城在絳州夏縣東北十五里本夏之都

大饗諸侯于璿臺

笺按易歸藏曰昔者夏后啓筮享神于晉之虛作為璿臺于水之陽王融

曲水園詩序夏后兩龍  
載驅璿臺之上謂此也

## 二年費侯伯益出就國

按秦本紀大業取少典之子  
曰女華生大費與禹平水土已

成帝錫玄圭禹受曰非予能成亦大費為輔帝舜曰  
咨爾費贊禹功其賜爾祿是為柏翳素隱曰尚書謂  
之伯益又按莊十六年傳滑伯同盟于幽杜預  
曰滑國都費河南緜氏縣伯益封費宜即此也

## 王帥師伐有扈大戰于甘

附注有扈在始平鄠縣○  
按書叙曰啓與有扈戰于甘

之野作甘誓馬融曰甘有扈氏南郊地名前漢志扶  
風鄠縣有扈谷亭後志有甘亭楚辭天問曰該秉季  
德厥父是臧胡終弊于有扈牧夫牛羊洪興祖注啓  
兼秉禹之末德而禹善之授以天下有扈以堯舜與  
賢啓獨與子故伐啓啓滅之有扈遂為牧豎也据  
韓非子曰有扈氏有失度驩兜氏有孤男三苗有成

駒桀有侯侈紂有崇侯虎晉有優施此六臣者亡國之臣也則啓之伐虜當別有說未必如洪氏所云

六年伯益薨祠之

箋按天問曰啓代益作后卒然離蠱洪氏補注引汲冢書曰益為啓所殺

今摺竹書益薨于帝啓六年啓方且祠之何有殺之之事漢律歷志曰壽王言化益為天子代禹皆不合經術亦是類也又按唐書宗室世系表臯陶字庭堅為堯大理生益益生恩成歷虞夏商世為大理

八年帝使孟涂如巴涖訟

箋按山海經曰夏后啓之臣孟涂是司神于巴巴人訟于

孟涂之所其衣有血者乃執之是請生居丹山西郭璞曰今建平郡丹陽城秭歸縣東七里即孟涂所居也

十年帝巡狩舞九韶于天穆之野

箋按山海經曰天穆之野高二千仞開焉

得始歌九韶郭氏曰竹書夏后開歌九韶史記索隱曰招音韶即舜樂簫韶九成故曰九招又天穆之野一曰大穆之野又曰大遺之野文心雕龍曰帝嘗之世咸墨為頌以歌九招九招古樂名也

# 十一年放王子武觀于西河

附注曰武觀即五觀也今頓丘衛縣○箋按王

季子啓之第五子也昭元年傳趙孟曰虞有三苗夏有觀扈商有姓邳周有徐奄杜注觀國今頓丘衛縣也水經注曰洪水又北逕頓丘縣故城西古文尚書以為觀地矣蓋太康第五君之號為五觀者也据此五觀即武觀也夏本紀謂帝太康失國昆弟五人須于洛汭作五子之歌則五子述大禹之戒以作歌必皆為啓之賢子竹書武觀則武是一人之名不得為五人矣古今人表啓子昆弟五人號五觀路史后啓五庶俱封于觀是為五觀皆謬又禹貢浮于積石至

于龍門西河孔疏曰河在冀州之西故謂之西河時夏啓都冀則觀在西河也

十五年武觀以西河叛

箋按武觀既放于西河至此以西河叛漢于此置畔觀縣屬東

郡謂此也

彭伯壽帥師征西河武觀來歸

箋按史記正義曰彭城徐州所理縣州東外城

古之彭國也周書嘗麥解曰其在啓之五子忘伯禹之命假國無正用胥興作亂遂亡厥國皇天哀禹賜

以彭壽思正夏畧謂此也

十六年陟

箋按六當作八据竹書太康元年癸未則后啓之陟當在庚辰蓋辛巳壬午三年喪畢而

太康即位是六當作八也



帝太康

箋按夏本紀夏后帝啓崩子太康立

元年癸未帝即位居斟鄩

箋按前漢書薛瓚注曰斟尋在河南汲郡古文太康居斟

鄩又昭二十三年傳王師晉師圍鄩鄩在洛州鞏縣西南鞏縣有地名鄩中括地志故鄩城在洛州鞏縣西

南五十八里書序曰太康失邦昆弟五人頹于洛汭此即太康之居為近洛也

畋于洛表

箋按夏書曰太康尸位以逸豫乃盤遊無度畋于有洛之表十旬弗返有窮后羿因民弗

忍距于河孔傳曰洛水之南蔡傳羿因民不堪命距太康于河北使不得返

羿入居斟鄩

箋按襄四年傳曰夏之方衰也后羿自鉏遷于窮石昔地記曰河南有窮后羿國于

有窮者即此也漢志北海平壽縣臣瓚引汲郡古文太康居斟尋羿亦居之時斟尋又自河南遷北海也

四年陟

箋按寰宇記曰拱州太康縣城太康所築故以名一統志太康縣在開封府城東南二百一十

里本夏太康所築城時太康為羿所距不得返國故陟于此

帝仲康

箋按夏本紀太康崩弟仲康立

元年己丑帝即位居斟鄩

箋按孔氏書疏曰羿廢太康猶立仲康不自立則是時羿

居斟尋而立仲康故仲康亦居斟尋也

五年秋九月庚戌朔日有食之

箋按唐志日度議曰夏后氏四百三十二年日

却差五度太康後二年戊子歲冬至應在女十一度書曰乃季秋九月朔辰弗集于房劉炫曰房所次之舍也集會合也不合則日缺可知或以房為房星知不然者且日之所在正可推而知之君子慎疑寧當

以日在之宿為文近代善曆者推仲康時九月合朔  
已在房星北矣按房者辰之所次星者所次之名其  
揆一也又春秋傳辰在斗柄天策輝輝降婁之初辰  
尾之末君子言之不以為謬何獨致疑于房星哉新  
歷仲康五年己巳歲九月庚戌朔日蝕在房二度虞  
劇以為仲康元年非也今摺竹書日食在仲康五年  
與大衍  
正同

命胤侯帥師征羲和

按書堯典疏曰夏王仲康之時胤侯命掌六師顧命陳寶有胤之

舞衣故知古有亂國書胤征叙曰羲和湏淫廢時亂日胤往征之作胤征

六年錫昆吾命作伯

按鄭語史伯曰昆吾為夏伯矣韋昭曰昆吾祝融之後陸終第二

子名樊為己姓封于昆吾昆吾衛是也其後夏衰昆吾為夏伯墨子曰昔夏后開使飛廉採金于山以鑄

鼎于昆吾是昆吾初為侯國至是錫以九命為伯也  
哀十七年傳衛侯夢見人登昆吾之觀北面而謀曰  
登此昆吾之虛括地志昆吾  
故城在濮陽縣西三十里

### 七年陟世子相出居商丘

箋按劉道原通鑑外紀相為  
羿所逐失國居商丘本此王

伯厚地理通釋以相居商丘為相居帝丘之誤非  
是蓋相先居商丘即位後十五年始徙帝丘也

### 依邳侯

附注一作依同姓諸侯斟灌斟尋○箋按定元  
年傳薛宰曰吾祖奚仲居薛為夏車正奚仲遷

于邳杜注奚仲為夏禹掌車服大夫太康地記曰奚  
仲遷于邳謂之下邳臣瓚曰有上邳故曰下邳蓋太  
康畋于洛表則邳侯世掌車服自必從之從太康及  
仲康至此凡十一年相在商丘與邳近其依于邳侯  
理或  
然也

帝相

箋按夏本紀仲康崩子帝相立

元年戊戌帝即位居商

箋按杜預曰宋商商丘三名一地括地志曰古商丘又羿所封

之地是羿居斟尋而立仲康又就封于商而立相故仲康及相皆依之以為居也

征淮夷

箋按淮夷謂淮水上之夷也昭元年傳曰周有徐奄杜注徐即淮夷非也魯頌保有鳧繹遂荒

徐它至于海邦淮夷蠻貊是淮夷與徐為二昭四年徐子淮夷會申楚執徐子秋楚子淮夷伐吳是會申時有淮夷有徐伐吳時既執徐子又有淮夷徐非即淮夷明矣又按世本云淮夷嬴姓此杜氏所由誤也

三年征風及黃夷

箋按後漢列傳東夷九種有風夷黃夷

七年于夷來賓

箋按東夷傳有于夷太子賢注曰后相七年于夷來賓

八年寒浞殺羿

筓按襄四年傳曰寒浞伯明氏之諱子弟也伯明氏棄之夷羿收之浞行媚于

內而施賂于外外內咸服羿歸自田家象殺之皇甫謐曰寒浞殺羿于桃梧而烹之以食其子其子不忍食之死于窮門晉志濟南平壽縣古寒國寒浞封此世本寒妘姓古今人表作韓浞師古曰羿之相也

使其子澆居過

筓按左氏傳浞因羿室生澆及豷處澆于過處豷于戈晉地地道記東萊掖縣有

過鄉北有過亭是古之過國括地志故過鄉在萊州掖縣西北二十里史記索隱曰過倚姓國

九年相居于斟灌

筓按薛瓚曰相居斟灌東郡灌是也括地志斟灌故城在青州壽光縣東

五十四里時相與羿居商丘羿既見殺故相出居斟灌也

十五年商侯相土作乘馬

筓按襄九年傳陶唐氏之火正閼伯居商丘相土因之商

頌相土烈烈海外有截王肅曰相土在夏為司馬之職掌征伐也孔疏曰相土是昭明之子契之孫也前漢刑法志殷周以兵治天下天下既定而猶立司馬之官四邑為丘丘十六井也有戎馬一匹牛三頭四丘為甸甸六十四井也有戎馬四匹兵車一乘牛十二頭甲士三人卒七十二人是為乘馬之法此當是相土所作乘馬遺制故商人因之而立司馬之官以相土在夏為司馬也若易繫服牛乘馬其來已久不始于相土矣世本黃帝之臣臣胘作服牛相土作駕馬則古時有相土作乘馬非夏后時相土也

### 遂遷于商丘

箋按此商丘當為帝丘蓋因前有商丘而誤也世本契居蕃昭明居砥石相土居商

丘荀子成相篇契玄王生昭明居于砥石遷于商丘左傳闕伯居商丘相土因之杜預曰宋商商丘三名一地一統志商丘在歸德府城西南三里高百邑一名闕伯臺則商即商丘也安得又從商而遂遷商丘

乎其云遂遷者蓋以相土作乘馬以兵車衛相遂遷  
帝丘如詩所謂載輯干戈爰方啓行者非以相土作  
乘馬而自遷帝丘也漢志東郡濮陽故帝丘左傳衛  
遷于帝丘衛成公夢康叔曰相奪予享杜注相居帝  
丘今濮陽唐高宗封泰山次濮陽問此為帝丘何也  
許敬宗曰昔顓頊始居此地其後夏后相因之春秋  
時衛成公自楚丘徙此左氏稱相奪予享以舊地也  
由顓頊所居故曰帝丘時后相自斟灌遷此則當為  
帝丘無疑

二十年寒浞滅戈

箋按太史公曰禹後分封用國為姓  
有戈氏戈木夏同姓路史以戈為己

姓非也哀十二年傳鄭人城嵩戈錫杜氏曰戈  
在宋鄭之間括地志浞既滅戈因遂封豷于戈

二十六年寒浞使其子澆帥師滅斟灌

箋按襄四年傳  
魏絳曰澆用師



滅斟灌及斟尋京相璠曰故斟尋國西北去灌亭九里是斟尋雖在河南亦嘗與斟灌相依共事故后相依斟灌以居也時帝相居斟灌十八年至是澆用師滅斟灌者蓋弒帝相之漸也

二十七年澆伐斟鄩大戰于濰覆其舟滅之

箋按澆論語作彘彘

盪舟蓋謂澆伐斟尋大戰于濰而覆其舟也先儒皆謂彘多力能陸地行舟謬矣又按山海經濰水出瑯琊箕縣屋箕山東北逕都昌縣東又東北入于海彘伐斟尋戰于是水而覆其舟淮南子濰水出覆舟山蓋因是以立名也今本作覆舟覆乃覆譌

二十八年寒浞使其子澆弒帝

箋按相居斟灌澆滅斟灌而不弒帝者以尚有

斟尋在也逮斟尋既滅遂敢于弒帝

后緡歸于有仍

箋按哀元年傳伍員曰昔有過澆殺斟灌以伐斟尋滅夏后相后緡方娠逃

自竇歸于有仍賈逵曰有仍后緡之國緡有仍之姓古今人表作有仍又昭二十八年傳昔有仍氏生女

黜黑后夔娶之此有仍氏之先也

伯靡出奔高

箋按杜預曰靡夏遺臣事羿者皇甫謐曰初夏之遺臣曰靡事羿死逃于有高氏

今据竹書帝相八年寒浞殺羿至二十八年帝相被弑羿死二十一年矣而伯靡始奔有高靡豈因羿死而始奔乎安見其為夏臣事羿者蓋靡乃夏之遺臣韜晦以事帝相者故相弑而遂奔有高耳應劭曰高偃姓臯陶之後

斟灌之墟是為帝丘后緡方娠逃出自竇歸于有仍

伯靡奔有鬲氏

箋按杜預曰今平原鬲縣括地志故鬲縣在德州安德縣西北十五里

夏世子少康生

丙寅年

少康自有仍奔虞

乙酉年。箋按哀元年傳曰后緡歸于有仍生少康馬為仍牧正澆使椒

求之逃奔有虞為之庖正以除其害虞思于是妻之以二姚邑諸綸杜注虞舜後郡國志梁國虞縣有綸城少康邑水經注曰汧水東逕虞縣故城北古虞國也

伯靡自鬲帥斟鄩斟灌之師以伐澆

箋按襄四年傳曰靡自有鬲氏收二

國之燼以滅澆而立少康杜注燼遺民胡氏曰少康靡鬲真人臣子哉經營四十年然後克殄元凶祀夏配天不失舊物

世子少康使汝艾伐過殺澆

甲辰年○箋按哀元年傳使汝艾謀澆杜注汝艾少

康臣謀候也

伯子杼帥師滅戈

箋按襄四年傳曰后杼滅豷于戈稱后杼者蓋伯子杼也哀元年傳曰使

季杼誘豷杜注豷澆弟也季杼少康子后杼也今据竹書伯子杼葢后杼也其帥師滅戈先使其弟季杼

誘之耳時少康二子伯與季並名杼杜云季杼即后杼非也

伯靡殺寒浞

箋按浞所恃澆與豷耳澆豷既滅則寒浞勢孤故伯靡于是殺之

少康自綸歸于夏邑

乙巳年○箋按已上繫年者皆紀年之本也少康丙寅生乙酉奔

庚年二十甲辰殺澆年三十九乙巳歸于夏邑年四十通典宋州虞城縣有綸城即少康邑在縣東南三

十五里也方輿紀勝少康中興復  
遷安邑今平陽府解州安邑縣

明年后緡生少康

箋按附注稱明年以羿況不當紀年故承上帝相二十八年乙丑況

使其子澆弑帝明年既長為仍牧正

箋按王肅曰牧正牧官之長也

丙寅而少康生也

箋按林堯臣曰椒澆臣

將至仍少康

逃奔有虞為之庖正以除其害虞思于是妻之以二

姚而邑諸綸

箋按杜預曰思有虞君也姚虞姓史記吳太伯世家伍員曰少康奔有虞有虞

思夏德不以虞思為有田一成有衆一旅

箋按賈逵曰方十里

為成五百人為旅能布其德而兆其謀以收夏衆撫其官職

箋按為仍牧正以下夏之遺臣伯靡自有鬲氏收二  
皆哀元年左傳文

斟之燼以伐浞

箋按二斟謂斟灌斟尋

浞恃澆皆康娛日忘其

惡而不為備少康使汝艾謀澆初浞娶雄狐氏

楚辭

天問曰浞娶雄狐眩妻爰謀何羿之射革而交吞揆之朱子集註曰言浞娶于雄狐氏女眩惑愛之遂與

浞謀殺羿也

有子早死其婦曰女岐寡居澆強圍往至其

戶陽有所求女岐為之縫裳共舍而宿

箋按天問曰女岐縫裳而

館同爰止王逸注曰女岐澆嫂也

汝艾夜使人襲斷其首乃女岐也

澆既多力又善告艾乃田獵放犬逐獸因噬澆顛隕

乃斬澆以歸于少康

箋按天問曰何少康逐夫而顛隕厥首謂此

于是夏

衆滅浞奉少康歸于夏邑

箋按帝王世紀曰禹自安邑都晉陽曾孫帝相遷帝

丘子少康中興還乎舊都復禹之迹也河東安邑夏禹都故曰夏邑

諸侯如聞之

箋按如聞

誤當作始聞蓋少康復歸夏邑皆少康父子及伯立靡二斟之所經營而諸侯不與故至是始聞之也

為天子祀夏配天不失舊物

箋按哀元年傳伍員曰祀夏配天不失舊物

帝少康

箋按夏本紀帝相崩于帝少康立索隱曰帝相自被篡殺中間經羿浞二氏蓋三數十年而此

紀總不言之直云帝相崩于少康立蓋疎畧之甚然按吳世家稱引伍子胥曰昔有過氏殺斟灌以伐斟尋滅夏后帝相帝相之妃后緡方娠逃于有仍而生少康為有仍牧正有過又欲殺少康少康奔有虞所

載甚詳蓋史公之意不與昇況以代夏故詳于彼而畧于此也

元年丙午帝即位諸侯來朝賓虞公

箋按少康既歸于夏邑諸侯始聞故

至是而來朝以共尊為天子也

二年方夷來賓

箋按後漢東夷傳有方夷注曰少康即位方夷來賓也

三年復田稷

箋按周本紀曰后稷之興在陶唐虞夏之際皆有令德后稷卒子不窋立不窋末年

夏后氏政衰去稷不務不窋以失其官而奔戎狄之間一統志慶陽府禹貢雍州之域周之先不窋所居號北豳春秋時為義渠戎國海內經曰后稷是播百穀稷之孫曰叔均是始為牛耕是始為國郭璞曰得封為國當即謂復田稷之時也皇王大紀以公劉遷豳附于少康之甲子未可據也文二年傳文武不



先不窟杜注  
不窟后稷子

后稷之後不窟失官

箋按括地志不窟故城在慶州弘化縣南三里是失官而自窟

于戎狄以居此也至是而復

十一年使商侯寘治河

箋按古今人表寘根園之子昌若之孫相土之曾孫也祭法寘

勤其官鄭注曰其官玄寘宋衷曰寘為司空

十八年遷于原

箋按郡國志河內軹縣有原鄉左傳杜注沁水西北有原城蓋少康自夏邑遷

原也

二十一年陟

箋按是年丙寅歷丁卯戊辰喪畢而帝杼即位

帝杼

箋按夏本紀帝少康崩子帝杼立索隱子音佇世本云帝佇作甲即帝杼也

元年己巳帝即位居原

箋按水經注濟有二源東源出原城今孟州西北有古原城路

史曰帝杼即位居原即其地也

五年自原遷于老丘

箋按定十五年鄭罕達敗宋師于老丘杜注宋地一統志老丘在開

封府陳留縣北四十里有老丘城地名攷畧曰縣有老丘城見陳留風俗傳

八年征于東海及三壽得一狐九尾

箋按魯頌曰三壽作朋又曰遂荒大

東至于海邦今据竹書征于東海及三壽則三壽疑東海古國名近魯者也瑞應圖曰六合一統則九尾

見狐

十三年商侯冥死于河

按魯語展禽曰冥勤其官而水死故商人郊冥而宗湯韋昭

曰冥冥後六世孫為夏水官勤于其職而死于水陳澗禮記集說曰冥即玄冥也水死未聞不有竹書焉從而証之又按漢禮樂志曰高始生玄王師古曰毛鄭說詩以玄王即高也此志既有高又有玄王則玄

王非高一人矣

十七年陟

按是年己酉歷丙戌丁亥喪畢而帝芬即位

杼或作帝宇一曰伯杼

按伯杼少康之元杼能帥子帝宇宇乃宇諱也

禹者也故夏后氏報焉

按魯語展禽曰杼能帥禹者也故夏后氏報焉韋昭曰

杼禹後七世少康之子季杼也能興夏道者今據竹書伯子杼嗣少康為天子則已為夏后矣又何俟夏

后始報之乎蓋伯杼少康元子而季杼其少子也所謂杼能帥禹者乃季杼耳左傳曰使季杼誘殪水經注曰大越之國秦為山陰縣會稽郡治也夏后少康封少子季杼以奉禹祀則季杼與伯杼為二而休文附注乃係之伯杼之下混矣顏魯公吳興地記烏程有杼山言夏后七世主杼巡狩至此則亦臆度之辭耳蓋以禹啓太康仲康相少康伯杼凡七世也

帝芬

箋按夏本紀帝杼崩子帝槐立世本作帝芬與紀年同

元年戊子帝即位

箋按帝芬即位不言居某者當亦嗣父居老丘也

三年九夷來御

箋按劉歆謂九夷在徐州莒魯之間爾雅疏後漢東夷傳夷有九種此東夷也

戰國策張儀曰楚破南陽九夷內沛許鄢陵危又李斯曰惠王用張儀之計南取漢中包九夷此西南諸

夷也。人按周禮地官之屬師氏居虎門之左，使其屬帥四夷之隸，各以其兵服守王之門外，則當日九夷來御，亦或有使之環衛王宮者乎？穆傳：虞人，次御郭氏曰：以次侍御，備有所問，則來御，亦謂來侍御也。

### 十六年洛伯用與河伯馮夷鬪

箋按歸藏曰：昔者河伯與洛戰而救卜昆吾。

占之不吉，當即為是時也。河伯洛伯皆當時諸侯伯，爵用與馮夷，其名也。穆天子傳曰：天子西征，驚行至于陽紆之山河，伯無夷之所都居，是惟河宗氏河宗伯天逆天子，燕然之山郭璞注曰：無夷馮夷也。蓋馮夷為伯天之遠祖，夏帝芬時諸侯也。水經注曰：竹書紀年洛伯用與河伯馮夷鬪，蓋洛水之神，其說非矣。

### 三十三年封昆吾氏子于有蘇

箋按韋昭曰：蘇己姓國，唐書世系表頡頏孫

樊封于昆吾，昆吾之子封于蘇，其地鄴西蘇城，是路史懷之武德有蘇故城，與世系表異。

二十六年作圜土

箋按周禮大司寇以圜土聚教罷民凡害人者買之圜土而施職事焉鄭

氏注曰圜土者獄城也聚罷民其中困苦以教之為善也水經注曰夏曰夏臺殷曰羑里周曰囹圄皆圜

土也然則帝芬之圜土蓋即夏臺也

四十四年陟

箋按是年為辛未而帝芒踰年改元

芬或曰芬發

箋按世本作芬附注或曰芬發也

帝芒

箋按夏本紀帝槐崩子帝芒立

元年帝即位

箋按是年為壬申

以玄珪賓于河

箋按堯八十六年司空入覲魯用玄圭瑞應圖曰王者勤苦以憂天下厚人薄

已則玄珪出蓋禹功既成天以賜禹至是而帝芒乃用以賓河也

十三年冬狩于海獲大魚

箋按星經曰天魚一星在尾後河中星明則海出大魚初

學記引紀年曰后荒即位元年以玄璧賓于河狩于海獲大魚誤合為一年事也

三十三年商侯遷于殷

箋按商頌宅殷土芒芒鄭箋曰自契至湯八遷始居亳之殷地

据竹書帝芒三十三年商侯遷于殷上距商侯冥死于河八十有二年此遷殷蓋玄冥之子于亥也世本相土居商丘冥往河治水子亥遷殷孔甲復歸商丘則此遷殷者正殷侯于亥也孔甲乃上甲之謚國語所謂上甲微能帥契者玄冥之孫子亥之子也計夏后帝芒三十三年下距湯始居亳之殷地百六十年其時已先稱殷周氏曰商人稱殷自盤庚始自此以前惟稱商而已今据竹書商在夏已稱殷安在湯始

居殷盤庚遷殷  
改商曰殷乎

五十八年陟

箋按是年  
為己巳

芒或曰帝荒

箋按史記索隱芒音  
亡鄒誕生又音荒也

竹書統箋卷三



欽定四庫全書

竹書統箋卷四

翰林院檢討徐文靖撰

帝泄

箋按夏本紀帝  
芒崩于帝泄立

元年辛未帝即位

十二年殷侯子亥賓于有易殺而放之

箋按子亥  
遷殷見世

本据竹書則子亥為冥子遷殷在夏后帝芬三十三  
年至是三十八年矣山海經罔民之國有人曰玉亥

托于有易河伯僕牛有易殺王亥取僕牛郭注云河  
伯僕牛皆人姓名誤河伯伯禹前所云河伯洛伯是

也僕牛地名也殷侯亥賓于有易北處于河伯僕牛之地有易乃殺王亥取僕牛如文八年取武城昭八年取邠之例不得以河伯僕牛皆為人姓名也又困民之國郭氏不注襄十四年傳若困民之主匱神乏祀社稷無主將安用之林唐翁注困民之主曰困若其民以主其國山海經困民之國當如是解

十六年殷侯微以河伯之師伐有易殺其君綿臣

郭璞按

曰上甲微殷之賢王假師以義伐罪故河伯不得不助滅之

殷侯子亥賓于有易而淫焉有易之君綿臣殺而放之故殷上甲微假師于河伯以伐有易滅之殺其君綿臣中葉衰而上甲微復典故殷人報焉

箋按前漢書古今人

表帝嘗妃簡過生高禹五世孫冥冥子垓師古曰垓音該据竹書垓即亥也天問該秉季德又作該是亥讀為垓也垓子微滅有易所以報父之讐也國語曰上甲微能帥契者也故殷人報焉

二十一年命畎夷白夷元夷風夷

闕

黃夷

箋按後漢西羌傳昔

夏后氏太康失國四夷背叛及后相即位乃征畎夷七年然後來賓至于后泄始加爵命由是服從注引竹書紀年曰后泄二十一年命畎夷白夷赤夷元夷風夷陽夷

二十五年陟

帝不降

箋按夏本紀帝泄崩子帝不降立世本作帝降

元年己亥帝即位

六年伐九苑

箋按史記張良曰關中北有胡苑之利索隱曰苑馬牧也馬生于胡又按水經注苑

川水出天水勇士縣之子城南山東北流歷子城川苑川水又北入于海疑即為九苑之故地也捷錄法

原曰不降席崇最久九苑一役僅可稱述蓋不降自即位至陟年共六十九年也

三十五年殷滅皮氏

箋按周左史戎夫記曰信不行義不立則哲士陵君政而生亂皮氏

以亡謂此也括地志絳州龍門縣西一里八十步即古皮氏城也

五十九年遜位于弟扁

箋按是年丁酉帝不降遜位于弟帝扁

帝扁

箋按夏本紀帝不降崩弟帝扁立今据竹書不降讓位于弟後十年始崩是史誤也

元年戊戌帝即位

十年帝不降陟

箋按是年為丁未

三代之世內禪惟不降實有聖德

十八年陟

箋按帝歷元年為己未則帝崩崩年當是戊午十八疑二十之訛

帝廕

箋按夏本紀帝崩子帝廕立

一名盾甲

元年己未帝即位居西河

箋按河在冀州之西曰西河

四年作西音

箋按呂氏春秋曰殷整甲徙宅西河猶思故處實始作為西音今据竹書殷王河實

甲名整自相遷無宅西河作西音之事惟夏后盾甲即位元年居西河四年作西音而呂氏誤記殷整

甲也梁劉勰文心雕龍夏甲嘆于東陽東音以發殷整思于西河西音以興是又以不韋誤矣

昆吾氏遷于許

附注己姓名與封于衛夏衰為伯遷于舊許○箴按郡國志濮陽古昆吾國左

傳昭十二年楚靈王曰昔我皇祖伯父昆吾舊許是宅是昆吾自衛而遷許也左傳許太岳之胤也杜注許神農之後堯四岳也迂齋云申呂齊許皆四岳後堯讓許由即其一也堯典咨四岳汝能庸命弼朕位是讓許由之實地理志潁川許縣故許國許後遷葉又遷夷又遷析即白羽又遷容城故以潁川之許為舊許今開封府許州即昆吾所遷地也

八年天有妖孽十日竝出

箴按高士傳堯讓天下于許由由曰十日竝出而燬火不

熄其光也不亦難乎此蓋以堯德光被如十日竝照所謂就之如日也世誤以堯時果有十日堯命羿射

十日中午其九妄矣觀竹書帝厘八年十日並出貞以妖孽書之豈竟時先有十日而不書乎其後桀二十九年兩日並出漢書五行志周靈王時有黑如日者五晉愍帝建興五年三日並照唐書突厥傳五日並出三月連明是皆妖孽之類也

其年陟

箋按帝厘元年己未八年陟則是丙寅据孔甲元年己巳則中間高隔丁卯戊辰二歲蓋孔甲

居喪三年而即位也夏制皆然

帝孔甲

箋按夏本紀帝厘崩立帝不降之子孔甲

元年乙巳帝即位居西河

箋按是己巳云乙巳誤

廢豕韋氏使劉累豢龍

箋按昭二十三年傳蔡墨對魏獻子曰昔有颶叔安有裔

子曰董父實甚好龍能求其者欲以飲食之龍多歸之乃擾畜龍以服事帝舜帝賜之姓曰董氏曰秦龍封諸澠川及夏后孔甲不能食而未獲秦龍氏陶唐氏既衰其後有劉累學擾龍于秦龍氏以事孔甲能飲食之夏后嘉之賜氏曰御龍以更豕韋之後杜預曰更代也以劉累代彭姓之豕韋鄭語曰澠夷董姓祝融後王符曰澠夷秦龍則夏滅之今平陽聞喜縣有董澤一名秦龍池見昭二十九年傳路史堯長子監明早死封其子式于留留累其後也以秦龍事夏

三年王畋于蒗山

箋按呂氏春秋曰夏孔甲遊于東陽田于蒗山天大風晦冥孔甲迷惑入

于氏室郡國志泰山南城縣有東陽城孔甲田于東陽蒗山

五年作東音

箋按呂氏春秋曰夏后氏孔甲作破斧之歌實始為東音



七年劉累遷于魯陽

按夏本紀劉累學擾龍以事孔甲龍一雌死以食夏后夏后使求

懼而遷去括地志劉累故城在洛州緱氏縣南五十里左傳曰遷于魯縣竹書曰遷于魯陽地理志南陽魯陽縣有魯山古魯縣御龍氏所遷續博物志劉累遷魯立堯祠于山一統志魯山在汝州魯山縣東

一百八十里

王好事鬼神肆行淫亂諸侯化之夏政始衰

按夏本紀孔

甲立好方鬼神事淫亂

田于東陽萑山天大風晦盲孔甲迷惑入

于民室

按山海經和山上無草木而多瑤碧實惟河之九都神秦逢司之是好居于負山之陽

主人方乳或曰后來見良日也之子必大吉或又曰

不勝也之子必有殃孔甲聞之曰以為余一人子夫誰殃之乃取其子以歸既長為斧所戕乃作破斧之歌是為東音劉累所畜龍一雌死潛醢以食夏后饗

之既而使求之懼而遷于魯陽其後為范氏

箋按左傳襄二

十四年范宣子曰昔句之祖自虞以上為陶唐氏在夏為御龍氏在高為豕韋氏在周為唐杜氏晉主夏盟為范氏括地圖曰夏德盛二龍降之禹使范氏御之而行葢因宣子之言而推原之也

九年

陟

箋按劉向列仙傳師門能使火為夏孔甲龍師孔甲不能修其心意殺而埋之野外一旦風雨

迎之訖則山木皆燔孔甲祠而禱之未還而道死又按陶弘景刀劍錄云夏孔甲在位四十年以八年九

月歲次甲辰采牛首山鐵錡劍一銘曰甲据竹書則  
孔甲八年乃壬子非甲辰又在位九年而陟無四十  
年

殷侯復歸于商丘

箋按上甲微以帝芒三十三年遷殷至孔甲九年凡一百三十五年復歸

商丘計下距湯之居亳僅二十五年則此復歸商丘者當是湯祖父主壬及主癸也

帝昊

箋按夏本紀孔甲崩子帝皋立

昊一作皋

元年庚辰帝即位

使豕韋氏復國

附注夏衰昆吾豕韋相繼為伯○箋按孔甲元年廢豕韋氏至是復之郡國志

東郡白馬縣有韋城古豕韋氏之國蓋彭姓之豕韋也

三年陟

箋按僖三十二年傳蹇叔曰嬴有二陵焉其南陵夏后臯之墓也杜注臯夏桀之祖父

帝發

箋按夏本紀帝臯崩子帝發立索隱按世本帝臯生發及桀與此異

一名后敬或曰發惠

元年乙酉帝即位

諸侯賓于王門再保墉

箋按王門當作玉門昭十八年傳鄭祈于四廓杜注廓城也爾

推墉謂之墉釋名曰墉容也所以隱蔽形容也尚書大傳曰天子貢庸鄭康成注貢大也言大墉正直也家語曰孔子觀四門之墉是有一門即有一門之墉也史記項羽紀成臯北門徐廣曰成臯北門曰玉門

後漢東夷傳夏后太康失德夷人始畔自少康已後世服王化遂賓于玉門獻其樂舞今按竹書帝發崩祭即位居斟尋則斟尋在河南時帝發必先居河南之地祭因居之去成臯不遠是諸侯賓于玉門當即此也月令注都邑之城曰保

會于上池

筓按會于池水之上曰上池猶郡在洛水之上則曰上洛是也

諸夷入舞

筓按孝經緯曰東夷之樂曰鞀南夷之樂曰任西夷之樂曰侏離北夷之樂曰禁五經通

義曰舞四夷之樂明德澤廣被四表也東夷之樂持矛舞助時之生南夷之樂持羽舞助時之養賈公彥周禮疏曰凡舞夷樂者皆門外為之此言諸夷入舞者不知其舞于門外否也

七年陟泰山震

筓按秦岱也王者更姓改物有事于泰山所以著代也泰山震則將有代起而

王者此  
其兆也

帝癸

箋按夏本紀帝癸發  
崩于帝履癸立

一名桀

元年壬辰帝即位居斟鄩

箋按括地志故鄩城在洛  
州鞏縣西南五十八里蓋

桀所居也國策吳起對魏武侯曰夏桀之居  
左河濟右泰華伊闕在其南羊腸在其北

三年築傾宮

箋按淮南墜形訓傾宮旋室高誘曰傾宮  
宮滿一項旋以玳玉飾宮也左思吳都賦

思比屋于傾宮畢結瑤而構瓊劉淵林注曰汲郡地  
中古文冊書曰桀築傾宮飾瑤臺紂作瓊室立玉門  
毀容臺箋按周紀表商容之閭鄭康成曰商家樂官知  
禮容所以禮署稱容臺儒林傳孝文帝時徐生

以容為禮官大夫是也  
祭毀容臺則禮樂廢矣

吠夷入于歧以叛

按音犬韋昭曰春秋以  
為犬戎小顏曰即昆夷也

六年岐踵戎來賓

按岐一作歧淮南陸形訓有歧踵  
民高誘注歧踵踵不至地以五指行

呂氏春秋富染篇夏祭染于羊辛岐踵戎是也大荒  
北經曰歧踵國在拘纓東其為人大兩足亦大一日  
大踵郭璞曰其人行脚跟不着地也孝經鈞命決曰  
焦僥歧踵重譯款塞也又按山海經曰流沙行五百  
里有山曰歧踵之山或  
即為歧踵國故地也

十年五星錯行

按漢志曰歲星曰東方春木於人五  
常仁也五事貌也仁虧說失逆春令傷

木氣罰見歲星熒惑曰南方夏火禮也視也禮虧視  
失逆夏令傷火氣罰見熒惑太白曰西方秋金義也

言也義虧言失逆秋令傷金氣罰見太白辰星曰北方冬水知也聽也知虧聽失逆冬令傷水氣罰見辰星填星曰中央季夏土信也思心也仁義禮知以信為主貌言視聽以心為主故四星皆失填星乃為之動易緯河圖曰日月五星同道起牽牛女虛危室壁奎婁胃昴皆行其南九尺畢北七尺觜參北一丈三尺貫東井出鬼南六尺柳北六尺出星張翼北一丈三尺軫北三尺貫角亢出成南二尺出房左右股間出心北四尺出尾北九尺出箕北六尺貫南斗復至牛此日月五星所行之常道也荊州占曰五星者五行之精也王者施恩希德正直清虛則五星順度出入應時人君無德遠君子近小人則五星逆行變色

出入  
不時

夜中星隕如雨

箋按春秋莊公七年夏四月辛卯夜中星隕如雨公羊傳曰如雨者非雨也非



雨則曷為謂之如雨不修春秋曰雨星不及地尺而復君子修之曰星隕如雨竹書夏桀十年星隕如雨

者紀年法  
春秋文也

地震

箒按周語曰夫天地之氣陽伏而不能出陰迫而不能烝如是而有地震

伊洛竭

箒按伯陽甫曰昔伊洛竭而夏亡韋昭曰禹都陽城伊洛所近謂此也余謂桀居斟尋在鞏洛

則伊洛最近何必遠追神禹乎又禹避丹朱陽城非都也

十一年會諸侯于仍有緡氏逃歸遂滅有緡

箒按昭四年傳椒舉

曰夏桀為仍之會有緡叛之山海經季荳之國有緡淵韓非子桀為有戎之會而有緡叛之戎當是仍之  
諺春秋僖二十三年齊侯伐宋圍緡杜注緡宋邑高平昌邑縣東南有東緡郡國志山陽東緡縣春秋時

曰緜

十三年遷于河南

箋按周書度邑篇武王曰吾將因有夏之居南望過于三塗北詹有河是

在大河之南也

初作輦

箋按爾雅徒御不驚輦者也郭璞曰徒輓輦車後漢陰就外戚驕貴井丹譏之曰昔桀乘人車

豈此耶又周禮鄉師之職大軍旅會同正治其徒役與其輦輦鄭注曰輦駕馬輦人輓行司馬法曰夏后

氏謂輦曰余車殷曰胡奴車周曰輜輦夏后氏二十人而輦殷十八人而輦周十五人而輦通典曰夏后

氏末代制輦是也

十四年扁帥師伐岷山

附注一作山民○箋按楚辭天問曰桀伐蒙山何所得焉王逸

注曰蒙山國名也言夏桀征伐蒙山之國而得妹嬉也今据竹書桀伐岷山即蒙山也岷山女桀二人曰琬曰琰非妹嬉也妹嬉有施氏女非岷山也逸注並誤

桀命扁伐山民山民女于桀二人曰琬曰琰后愛二

人女無子焉斲其名于苔華之玉苔是琬華是琰按

歐陽詢藝文類聚引紀年曰桀伐玼山玼山莊王女于桀二女曰琬曰琰今本竹書無莊王事知遺佚多

矣而棄其元妃于洛曰妹嬉按國語曰昔夏桀伐

焉注有施于傾宮飾瑤臺居之按天問曰妹嬉何肆湯何殛焉似亦以

妹嬉見棄為問又列女傳曰夏桀既棄禮義淫于婦人求四方美女積之後宮作瀾漫之樂則琬琰亦其

一也又按管子地數篇曰女華者桀之所愛也曲逆者桀之所善也湯皆事之以千金女華即女瑛也以刻于華曰女華又按國語曰末喜與伊尹比而亡夏樂府折楊柳行曰末喜殺龍逢桀放于鳴條甚其罪耳王兪州四部稿曰竹書紀年桀棄其元妃于洛曰妹喜氏則妹嬉以棄而亡國非以嬖而亡國也据此則與桀奔南巢者疑為琬瑛而非妹喜也淮南子曰湯放桀于歷山與妹喜同舟浮江奔南巢之山未足也据

十五年商侯履遷于亳

附注成湯元年○箋按孔甲九年殷侯復歸于商丘至此又自

高丘而遷亳湯居亳與葛為鄰者也

十七年商使伊尹來朝

箋按孫子兵書云伊尹名摯呂氏春秋本味篇有伋氏女子採

桑得嬰兒于空桑之中獻之其君其君今焯人養之  
長而賢湯問伊尹使人請之有佚氏有佚氏不可湯  
於是請取妻為婚有佚氏喜甚以伊尹為媵送女湯  
得伊尹祓之于廟明日朝而見之說湯以至味高誘  
曰焯猶庖也一統志空桑城在陳留縣南  
一十五里帝王世紀云伊尹生于空桑

二十年伊尹歸于商及汝鳩汝方會于北門

箋按書叙曰伊尹去

亳適夏既醜有夏復歸于亳入自北門乃遇汝鳩汝  
方孔傳曰鳩方二人湯賢臣又焦氏筆乘曰媵說丈  
送也史載湯塔有莘以伊尹為媵送女故稱有莘媵  
臣楚辭魚鱗鱗兮媵予爾雅亦云媵將送也然則世  
以媵臣為賤者非也蓋彼有迎此有送春秋如齊逆  
女者迎也此以伊尹為媵者送也胡傳引公羊三國  
來媵以為媵妾者非也若以為媵妾魚鱗鱗兮媵予  
亦可為妾乎後漢書馮衍顯志賦曰昔伊尹之干湯

兮七十說而乃信太子賢注曰伊摯負鼎俎以干湯七十說而乃信謂年七十說湯乃得信也信音申

二十一年商師征有洛克之

箋按周左史戎夫記曰昔有洛氏宮室無常池園廣

大工巧日進民不得休農失其時  
饑饉無食成湯伐之有洛以亡

遂征荆荆降

箋按商頌曰維汝荆楚居國南鄉在昔成湯自彼氐羌莫敢不來享莫敢不來王是

也

二十二年商侯履來朝命囚履于夏臺

箋按夏本紀桀乃召湯而囚之

夏臺索隱曰獄名夏曰夏臺皇甫謐曰地在陽翟是也太公金匱曰桀怒湯以諛臣趙梁計名而囚之鈞臺置之重泉杜預左傳注河南陽翟有鈞臺陂一統志夏臺在河南鞏縣西南即夏桀囚湯處是重泉亦

即夏臺之上室也楚辭天問曰湯出重泉夫何臯尤不勝心伐帝誰使挑之朱子集注曰重泉地名在左馮翊史記所謂夏臺也然漢馮翊重泉縣今在西安府華州蒲城縣東南四十五里秦本紀簡公六年整洛城重泉者也安得一之洪興祖楚辭補注亦以為馮翊重泉皆誤

## 二十三年釋商侯履諸侯遂賓于商

箋按帝王世紀曰夏桀無道臯諫者

湯使人哭之桀囚湯使于夏臺而後釋之諸侯由是咸叛桀附湯同日供職者五百國三年而天下咸服

## 二十六年商滅溫

箋按括地志故溫城在懷州溫縣西三十里

## 二十八年昆吾氏伐商

箋按郡國志東郡濮陽古昆吾國鄭語史伯曰己姓昆吾則商

滅之是也前漢書古今人表有昆吾師古曰如姓國也帝王世紀曰河東安邑縣有昆吾亭疑此伐商者

乃如姓之昆吾與桀同姓故因為桀而伐商非必定是濮陽之昆吾也

商會諸侯于景亳

箋按昭四年傳椒舉曰高湯有景亳之命郡國志梁國蒙縣劉昭注引帝

王世紀曰有北亳即景亳湯所盟處又按有景山故名景亳

遂征韋商師取韋

箋按郡國志東郡白馬縣有韋鄉鄭語史伯曰彭姓豕韋則商滅之又按

古今人表有劉姓豕韋

遂征顧

箋按古今人表有鼓師古曰即顧國也史記索隱曰郡國志顧在東郡廩丘縣北今曰顧城春

秋哀二十一年公及齊侯盟于顧即是城也

太史令終古出奔商

箋按姓氏譜紂行亂政三旬不朝終古執圖法泣諫不聽先奔于商



三年而桀乃亡淮南記論訓夫  
夏之將亡太史令終古即奔商

二十九年商師取顧

箋按詩韋顧既伐是  
湯先取韋後取顧也

三日竝出

箋按三當作二孝經緯曰夏時兩日並出  
曰禁無道兩日照荊州占曰兩日以上出天

下有灾夏以兩日亡京氏  
曰兩日並出天下爭王

費伯昌出奔商

箋按夏后啓二年費侯伯益出就國此  
費伯益其後也王充論衡曰禁無道兩

日並照在東者將起在西者將滅費昌問馮夷曰何  
者為設何者為夏馮夷曰西夏也東殷也於是費昌  
徙族  
歸殷

冬十月鑿山穿陵以通于河

箋按通志曰禁鑿山穿陵  
以通于河諫者曰洩天氣

發地藏天子失道後必有敗  
祭殺之耆老或諫祭又殺之

三十年瞿山崩

箋按通志曰瞿山崩為大澤水深九尺山覆于谷下反在上

殺其大夫闞龍逢

箋按通志曰桀有暴臣于辛陵轢諸侯諛臣左師曹觸龍讒賊忠良闞龍

逢引黃圖以諫曰古之人君愛民節用享國之日長今君用財若無窮殺人若弗勝亡無日矣立而不去  
桀曰子又妖言矣於  
是焚黃圖殺龍逢

商師征昆吾

箋按桀二十八年昆吾伐商商既征韋又征顧至是遂征昆吾

冬聆隧災

箋按聆當作聆音琴周語內史過曰商之亡也回祿信于聆隧韋昭曰回祿火神再宿曰

信

三十一年商自陟征夏邑

箋按書叙曰伊尹相湯伐桀升自陟遂與戰于鳴條之野

作湯誓孔傳曰夏都安邑湯升道從陟出其不意陟在河曲之南

克昆吾

箋按昭十八年傳二月乙卯周毛得殺毛伯過畏弘曰毛得必亡是昆吾稔之日也詩長發疏

曰言昆吾以乙卯日亡也

大雷雨戰于鳴條

箋按括地志高涇原在蒲州安邑縣北三十里南阪口即古鳴條陌也鳴

條戰地在安邑西皇甫謐按伊訓曰造攻自鳴條朕哉自亳今安邑見有鳴條陌昆吾亭左氏以為昆吾同以乙卯日亡韋顧亦爾故詩曰韋顧既伐昆吾夏桀於左氏昆吾在衛乃在濮陽不得與桀異處同日而亡明昆吾亦來安邑欲以衛桀故同日亡而安邑有其亭也今据古今人表有姁姓昆吾或在鳴條則

昆吾以乙卯亡未必  
即濮陽之昆吾也

夏師敗績

箋按秦本紀若木元孫費昌當夏桀之世去夏歸商為湯御以敗桀于鳴條

桀出奔三朶

箋按郡國志濟陰定陶縣有三朶亭

商師征三朶

箋按書叙曰湯伐三朶俘厥寶玉誦伯仲伯作典實孔傳曰二臣作典實一篇

戰于郟

箋按呂氏春秋簡選篇殷湯良車七十乘必死六千人以戊子戰于郟遂禽移大犧誘注曰桀

多力能推大犧因為號而禽克之又按郡國志濟陰成縣本國左傳杜預注東平剛父縣有郟鄉

獲桀于焦門

箋按淮南主術訓桀之力制脩仲鈞索鐵欵金然湯革車三百乘困之鳴條擒之焦

門高誘曰焦或作巢一統志巢湖在巢縣西十五里一名焦湖周圍四百餘里據此則焦門當即是巢門

也

放之于南巢

箋按周書殷祝解湯將放桀于中野士民聞湯在野皆委貨扶老攜幼奔國中虛桀

與其屬五百人南徙千里止于不齊民往奔湯于中野桀與其屬五百人徙于魯魯士民復奔湯桀與五百人去居孔晁注不齊魯地名居南巢之地各地理志居巢縣屬廬江通鑑注廬江六縣有居巢城桀奔此因以放之隋煬帝大業十年二月詔曰黃帝五十戰成湯二十七征方乃德施諸侯令行天下帝王世紀曰成湯凡二十七征而德施于諸侯

自禹至桀十七世有王與無王用歲四百七十一年

起壬子終壬戌○箋按帝王世紀自禹至桀并數有窮凡十九王合四百三十二年世史始禹甲戌終桀

甲午共四百四十一年葉史始禹丙子終桀甲午共  
四百三十九年今據竹書昇況不在王數凡十有七  
王用歲四百  
七十一年

竹書統箋卷四